

國朝詩人徵略二編

國朝詩人徵略二編卷七

番禺張維屏子樹輯

方殿元

字蒙章號九谷廣東番禺人康熙三年進士官鄰城江寧二縣知縣有九谷集

九谷集方殿元撰凡樂府二卷諸體詩二卷雜文一卷末卷爲環書上下篇附以四書講語數則其環書下篇多發明易義蓋亦雜家流也

四庫提要

九谷子曰道始於陰陽欲莫大乎男女孔子曰吾未見好德如好色者也欲之蘖也坎陽使之也夫

婦與知與能卽在男女媾精上看聖人亦夫婦中

人然同在夫婦中自有不同處試看冀缺梁鴻夫

婦已有別何況聖人伉儷自是火裏蓮花

環書

松心子曰在天地爲陰陽在五行爲水火在人身
爲血氣衆人同此血氣聖人亦同此血氣有血氣
則不能無相火有相火則不能無慾心故曰血氣
未定戒之在色衆人理不勝欲甚且縱欲而害理
聖人理能制欲熟則忘欲而安理夫忘欲固難卽
制欲亦不易欲所以難制者火也此卽所謂相火
代君火而行事故曰相也此火寄於肝膽行於三

焦清心寡欲則火不上炎火降水升則陽不妄動
然膽爲甲木肝爲乙木相火寄於此火得木則旺
故人身之中肝膽宜涼而脾則宜溫肺胃喜潤而
脾則喜燥飲食入胃而能化全賴脾土以運之脾
土居中而能運全賴腎火以蒸之時醫不知分別
但云有火有火往往因肝膽之病而誤伐脾腎日
以陰凝寒滯之藥困遏脾陽消滅腎火以致不死
於病而死於醫目見耳聞不知凡幾夫道莫大於
陰陽欲莫大於男女事莫大於生死故因論陰陽

而推類及之

松心
日錄

九谷子曰聖人論無終食之間違仁先從富貴貧賤發論此關不破微有汲汲戚戚之心要去求仁

自絕其路矣

環書

松心子曰貧欲富賤欲貴人之常情聖人不禁人求富貴但以道義爲主故曰不以其道得之不處也不義而富且貴於我如浮雲史書所載倫類之中相爭相奪相傾相害皆欲富貴之心有以致之其初本一念之微其後成衆著之惡夫旣不以道義而得富貴乃或得而不能享或享而不克終卽克終而少者數年多者數十年於兩大之間直須

與之頃耳得須臾之樂而失固有之良仁者固不爲智者亦不爲也然而能知之者鮮矣能守之者益鮮矣古而今遠而近旦而暮少而老無非欲富貴之人無非欲富貴之念甚至斧斤多而山木空牯亡久而夜氣息而猶孳孳焉未有已也豈不重可嘆哉然則爲之奈何曰人之身卽不能不局於富貴貧賤之中人之心則不可不超乎富貴貧賤之外雖不敢言求仁然心能超乎富貴貧賤之外則我自有所以爲我者不因富貴而增不因貧賤而損夫如是然後可以立吾之志畜吾之德充吾

之學擴吾之才

松心
日錄

九谷子曰人性明則氣清性昏則氣濁到死時清者上升濁者下降有生時宰相王侯死後不如乞丐有生時寒士卑官死後直登台斗生前日短死後日長欲得死後天爵須修生前天爵

環書

松心子曰九谷此論亦足鼓舞人向善之心然君子爲善不求邀福於生前遑計升天於死後惟生前日短死後日長二語驚心動魄足以勸善懲惡扶忠誅奸卽以秦檜言之東窗陰謀取快一日西湖長跪抱辱千年他如王莽曹操董卓李林甫盧

杞蔡京嚴嵩之流載入史鑑供文人學士之笑談
演出戲場受野老村氓之指罵生前日短欲不短
而不能死後日長求不長而不得吁可畏哉

松心
日錄

摘句

我有一物先天地遊天地糜腐不沈不浮

善哉
行

雲臥對扶桑欲覩太初日須臾三丈輪環

帶霞五色萬里搖空光漸覺東海白

登秦
嶽

東上百丈崖攀蘿愁日暮欲尋千葉蓮仙

蹤忽迷誤

登華
嶽

獨上紫蓋峰亭亭舒四顧崢嶸傲視融嶂

帆接天柱

登衡嶽

嵯峨臨朔野一顧窮大荒始信天北傾

尺日月光

登恆嶽

昔余登泰岱曾候羲和出今夕宿石樓復

見中夜日

登羅浮

南溟本是鯤鵬窟胡爲鯨鱷來相奪楊僕

樓船十萬師陸賈書生三寸舌

羊城行

玉女初秋能響杵神仙七日尙吹笙

登嵩嶽

秦塞秋風靈武郡漢家明月賀蘭山

蒲夏

十載懷人憂患後三山歸客亂離中

元孝過訪

周宏

字子重江蘇無錫人康熙三年

賜進士第三人官侍講學士

學士居家孝友廉讓

江蘇詩徵

摘句 安得有錢買胥吏賑籍無名長官詈

道旁歎

有錢與胥吏然後名得入賑籍無錢則雖

有賑不能領也窮民之苦如此凡牧民者

宜知之

松軒隨筆

張玉裁

字禮存江蘇丹徒人康熙六年

賜進士第二人官編修

摘句

秋從今夕到月向異鄉看

立秋

有巧輸人乞因貧得夢安

七夕

賈其音

字叶六號澹菴江蘇高郵人康熙六年進士官浙
江知縣有雨香亭諸集

有程秀才甚貧其奴巨富欲脫戶因誣程叛逆澹

菴剖其冤奴反坐人共快之

江蘇詩事

摘句

峭壁倚天開一望盈蒼蘚樹古互攬孛蛟

龍恣仰偃田園豈不樂靈異如此解

桐廬曉發

沈允範

字康臣號肯齋浙江山陰人康熙六年進士官中書舍人有采山堂集

肯齋題陳海樵畫云金庭相業今安在後世惟知

陳海樵金庭謂明朱相國庶也生前之名畫師何

敢比宰相死後之名宰相恐不及畫師松軒隨筆

摘句 文章通貨殖波浪狎江湖佑客樂

問禮人推周柱史傳經門有魯諸生寄施愚山

北闕辭榮三徑掃東山得句萬人傳送柏鄉師

九月繁霜凋白草五更明月凍黃河宿遷對月

陸 棻

原名世枋字次友號雅坪浙江平湖人康熙六年
進士官內閣學士有雅坪文稿

雅坪年十四父爲兵所執將加刃雅坪大呼曰甯
殺我勿傷吾父弁將異之俘以獻固山馬公馬撫
以爲子後父兄訪得之詣馬第乞放歸鶴徵錄

雅坪一日七遷從編修贊善授閣學

鶴徵錄 日
疑是月候考

摘句 櫓聲來木杪帆影度城樓

江漲

一日七遷千古少周年致政寸心安

病中
自述

無藥能延炎帝壽有人曾哭老聃來

國朝詩人徵略二編卷八

番禺張維屏子樹輯

易宏

字渭遠號秋河廣東新會人有雲華閣詩略

秋河又號雲華子著有道德經注金丹會輯青山外史俱散佚詩集爲黃石溪明經手寫本爰借鈔

而校刊之

詩雪軒刊本跋

吳畱村贈秋河詩云思入風雲傳絕響力窮天地識驚才陳元孝贈秋河詩云入羣野鶴能驚衆出土新松卽傲秋想見雲華個儻不凡之氣

聽松廬詩話

無不散者世人富貴之場有不散者文士英靈之
氣往往幾絕而復續幾亡而復存莫或爲之若或
使之自古及今未可更僕卽如易秋河雲華閣詩
亦其一也秋河受知於畱村制府邀往瀋陽因得
縱覽名山五嶽登四倦遊歸里借寓僧廬身歿無
人僧爲殯葬可謂窮矣迨至阮宮保修通志不載
其人溫舍人輯詩海不載其詩不獨窮於生前抑
且阨於死後雖雁山文集有傳一篇嶺海詩鈔存
詩四首然土中劍氣大半沉埋水底珠光孰爲探
取乃譚玉生明經意切桑恭情敦竹素見之故人

篋裏拔之故紙堆中六卷內才人心血收於蠹穿

蟬蝕之餘百年前窮士篇章壽諸忠簡文忠之列

伍紫垣郎中刻粵東十三家始於李忠簡殿以易雲華雲華之詩於是復存

雲華之氣於是不散矣

聽松廬文鈔

讀雲華詩題絕句萬里山川助勝情幽燕老氣自

崢嶸生前知已逢吳季死後桓譚有玉生

老漁晚唱

方九谷登五嶽詩皆五言易秋河登四嶽詩皆七

言茲錄三首其餘警句摘錄於後

聽松廬詩話

登西嶽

玉女高寒不肯孤蓮花落鴈隔煙扶三峰天外懸

青影萬壑雲中鎖綠燕虞狩已闌藏碧簡軒游曾
此受璿圖洞天深處逢毛女猶有琴聲隱玉壺

登東嶽

千秋玉簡有遺風北面羣山識岱宗膚寸雲爲天
下雨鴻濛氣化日邊龍瀑流飛練銀潢散嶺勢蟠
霞紫翠重七十二君無問處大夫猶自識枯松

登中嶽

嵩高延竚接青霞二室峯寒萬仞斜河洛分流蟠
下界江山平望盡中華灰飛劫火留槐影風散仙
壇落柏花我欲乘鸞歸碧落好從翠黛覓丹砂

劉頊

劉頊興亡總不知，獨餘情淚泣蛾眉。
英雄氣爲紅顏短，腸斷虞姬與戚姬。

題惜花圖

靜容小影

畫圖畫得態如真，手折名花一朶春。
卿自惜花儂惜貌，可憐俱是斷腸人。
古今薄命佳人同聲一哭

摘句 尺地英雄血，千秋戰伐場。

榆林

山勢連天峻，河流入地低。

登飛狐嶺

松濤捲壑聲千里，山翠浮空影萬重。

登南嶽

天遠樹連雲，夢曉月明人。
隔洞庭，秋

黃鶴樓

三秋白草黏天去萬里黃河坼地來

居庸北望

露冷金盤仙亦淚月殘華表鶴空愁

燕中秋懷

易暴有天畱二子行仁無地復三分

夷齊廟

恩酬故主寒灰日衣斬仇人熱血時

豫讓橋

淮邊古廟依流水地下冤魂泣大風

淮陰侯祠

統紹高光還割據道侔伊呂但偏安

武侯祠

風急銀濤飛伍浪月明瑤瑟弔湘魂

屈原甲古

入地定能成碧血問天莫欲挽銀河

贛五忠祠

十年死別重相見萬里鄉程一夜還

夢

瓊瑤有號如仙子富貴無心亦素王

白牡丹

丁煒

字澹汝號雁水福建晉江人官按察使有問山詩
集文集

君以人才舉授漳平教諭改魯山丞遷獻令獻地
僻事簡得肆力於詩歌古文詞擢戶部主事時議
行閩鹽稅力陳不可事得寢轉員外遷郎中出爲
贛南道至則造處士魏禮之廬延致使院闢篋園
詩花卉日集四方遊客觴詠其中郡以產穀名民
問米艘下流向有陋例適藩檄行郡徵其稅以代
定南協餉牙役藉以需求君因摘地方十弊請上

官禁革制府于成龍深嘉之陞湖廣按察使有解
死囚二十餘人皆盜所誣者君察其寃悉貸之因
事左遷姚安守纂修郡志尋復臬職赴京道得目
疾寓金陵就醫尋歸越七年卒煒刻意爲詩力追
唐宋諸家濟南王阮亭亟稱之與同時海內十子

齊名著有涉江問山詩文集

泉州府志
贛州府志

雁水先生事蹟及詩已見詩人徵略初編矣近與
先生族孫丁星南拱辰交乃知先生爲姚安守後
復爲按察使又見問山全集因據星南所錄泉州

贛州兩志補輯並詩句刻入二編

聽松廬
詩話

摘句

歷世周秦遠擊天歲月長

夫子植檜

獨表如存誼長留反築心

子貢植楮

鑪前童檢藥燈下鼠窺人

病中

地厭窮愁客天留患難人

巨傾幸免

亂雲奔晚岫片雨壓秋江

雨泊

久客難爲客新寒易覺寒

久客

故園兄是父羈旅僕爲兒

述懷

寺從山頂出雲帶水聲流

遊虎丘寺

頓忘行役倦新月上人衣

元人句云新月入人家丁雁水句云新月上人衣各有其妙聽松廬詩話

市上偏逢屠客少，眼中空見酒人多。

蘇門懷古

早教細柳軍吳地，豈有包茅廢楚疆。

長安雜興

諸將有書徒馬服，生涯無地問菟裘。

同上

焚餘秦火還畱石，刪後周詩尙有章。

石鼓

彝門伏劍思公子，博浪空椎恨始皇。

汴梁懷古

天下治安猶痛哭，南方卑濕漫傷嗟。

賈誼宅

放言苟况偏違世，好道嵇康悞觸機。

李卓吾墓

鄭莊老去猶耽客，疏廣歸來不買田。

贈吳蘭次

鄭虔應是稱三絕，平子何須詠四愁。

惟有寒雞兼落月，送將離恨出長安。

曉發

國朝詩人徵略二編卷九

番禺張維屏子樹輯

性德

字容若滿洲人康熙十二年進士官侍衛有通志
堂集

容若年十七爲諸生十八舉鄉試十九成進士二

十二授侍衛

茶餘
客話

容若原名成德大學士明珠之子世所傳紅樓夢
賈寶玉蓋卽其人也紅樓夢所云乃其髫齡時事

其詩善言情又好言愁摘錄兩首可想見其人

予生未三十憂愁居其半心事如落花春風吹已
斷行當適遠道作計殊汗漫寒食百草青薄暮煙
溟溟山桃一夜雨茵箔隨飄零願餐玉紅草一醉
不復醒 幽谷有美人無言若有思含顰但斜睇

吁嗟憐者誰予本多情人寸心聊自持私心託遠

夢初日照簾帷詩中美人卽林黛玉耶

聽松廬詩話

容若無題起句云是誰看月是誰愁余爲作出句

云同我惜花同我病兩句中皆有黛玉在

松軒隨筆

摘句 秋風吹蓼花清淚忽成血

幾夜西風消瘦盡問儂還似舊時無

國朝詩人徵略二編卷十

番禺張維屏子樹軒

張文炳

字質夫號南麓湖南湘潭人康熙二十六年舉人
官仙居文登二縣知縣有鄰嶽堂集

君祖次柳公少好劍擊射獵與楊嗣昌善嗣昌督
師南征遣使迎公公既至嗣昌聽人言將招撫張
獻忠公遂辭歸襄陽築堡以守獻賊攻堡兩晝夜
賊怒曰但縛張某下吾當退公湧身從堡下賊擁

以行公自刎堡中人皆獲全

兩湖張氏家乘

君父熹宦公官參將從督師何公騰蛟駐長沙闖賊郝搖旗等率萬人入湘陰督師命萬大鵬二武持手諭往撫賊悉降以功晉都督公字君爵何公送張君爵之武岡詩有報國惟憑心與力勤勞今日屬將軍之句後公聞督師殉節詣湘潭沿河索屍親負之出具棺斂哭奠成禮吳三桂反遣將約公公不從避地上湘遂爲湘潭人卒年八十五無

子以弟子文炳嗣

張氏家乘

明史未載公名史筆自當簡約既云二人一卽

公也何公詩有報國勤勞語尤爲顯證

松軒隨筆

文炳仕仙居文登令俱有賢聲分校浙闈所拔悉知名士晚歸田以著述自娛子孫蕃盛擢巍科列

詞垣後先相繼

湖南通志

公子八人最著者坊

拔貢塹拔貢垣舉人採舉人

增舉人

公孫二十六人最著者九鉞舉人九鈞知縣

進士九鑑舉人九鐘舉人九鋌舉人九鎰進士九

鐔進士

公會孫數十人世淶進士世濂進士

世法進士

世浣舉人公元孫數十人家渠舉人

家樞舉人

家榘副貢家榘諸生家桐國學生家棻

進士

公之門才不獨楚中所少卽海內亦未易

多觀也且不徒以科第著兼以文學鳴然人但知

其累世科名之顯榮而不知其先世忠義之隱德

小珣大令

家棧

懃懃焉述舊德誦清芬刻遺書編

家乘且不遠千里由楚寄粵請載入詩人徵略欲

先世之令名懿行易於流傳此孝子不匱之心也

余故爲撮其大略著於篇端用慰小珣之孝思至

樂道人善固鯁生之素懷亦此書之本旨也

聽松廬文

鈔

標題

對酒

五古

中丞泰巖夫子招遊嶽麓諸名

勝長句紀事

七古

摘句

百年渾似夜一枕竟垂名

黃梁夢

罪真非戰伐死自信英雄

烏江懷古

帝教洪水開文字身到層霄間矐靈

祝融峯

七十二峯俱在外九千餘丈恰當中

半山亭

萬里太清涵巨浸百年青草落扁舟

洞庭月泛

天連吳越春偏麗人到湖山眼自青

西湖

三字獄傾炎宋鼎一抔土覆岳家軍

岳王墳

名山事大誰招隱處士聲高一問心

村居

幾室馨香新俎豆百年朋酒舊衣冠

棠甲平如青玉案梨花開當素心人

園居

未見書談天內外自鳴鐘測日東西

自有山川淳朴地不求聞達草茅廬

題友書屋

言詩弟子誰端木進學先生自退之

贈李穆菴

吳地自來多別恨楚人終古重離情

別雷別

愁筆墨多吾少賤嫁衣裳盡爾清癯

悼七

忠告真如朋友失孔懷誰補弟兄孤

太上豈宜繩我輩英雄原不諱柔腸

和靖梅花蒙叟蝶饒他曠達總淒涼

先生悼七七律二十首語多真至茲摘錄

數句讀之已足令人增伉儷之重

聽松廬詩話

國朝詩人徵略二編卷十一

番禺張維屏子樹鞞

蔡 珽

字若璞號禹功漢軍人康熙三十六年進士官吏部尚書直隸總督降奉天府府尹有守素堂集

禹功由庶吉士授檢討遷中允康熙五十一年提督貴州學政遷侍讀學士五十九年充河南鄉試正考官六十一年由禮部侍郎擢四川巡撫雍正二年川陝總督年羹堯劾珽部議擬斬三年解珽至都

特授都察院左都御史瑛奏請設安徽學政從之

大臣傳節鈔

禹功處富貴崇高之境而其詩乃蕭閒清適似山林恬澹者之所爲至考其生平行事如受夔州府程如絲金九百兩銀六萬兩遂保奏治行第一又袒庇知縣黃振國又讒毀岳襄勤公

鍾琪

若是則

其人與其詩大不相類蓋言不足以定人自古然矣然當日年羹堯田文鏡皆聲勢烜赫而禹功與之抗則其所獲罪名或年田兩人之黨從而誣陷亦未可知後蒙

恩赦宥殆日久其事得白與至就詩論詩頗多可采之句

在漢軍詩人中固當高置一座矣

聽松廬文鈔

摘句 衣食苟無慮奚事千黃金

疎林度清磬一燈僧舍懸深山少更漏獨

向西窗眠靜坐見明月欹枕聞寒泉

宿廣泉寺

方知別離苦乃自親愛生

奇張萬石

風靜樹聲歇月明人影清

月夜

魚蟹橋邊市樓臺水上城

沅州道中

江從洲外闊天向樹邊垂

登焦山

亂谿惟見石半嶺忽逢僧

廣泉道中

兩山中斷處一片遠峰青

來青軒

桂好難離月星愁莫近河

無題

滿地落花人去後一天寒雨雁來初

閒中舊事都如水夢裏前身竟是僧

堪自信時惟有嬾最長人處是無能

斜景半開雲斷處好山都在夕陽邊

大湯山

疎星在牖夜如水涼月當門人飯牛

旅夜

詩句瘦於寒夜鶴心情閒似暮山猿

贈僧

半篙水碧魚聽法一榻雲閒鶴補詩

斷碑砌屋依荒井野蔓牽花上廢牆

過香界寺

何年得遂還山願日日看山過此生

山居

福敏

字龍翰號湘鄰滿洲人康熙三十六年進士官至
大學士諡文端

福敏姓富察氏庶吉士散館歸班

高宗純皇帝初就傅福敏侍讀雍正元年授內閣學士兼
禮部侍郎十年署工部尙書

特命協辦大學士乾隆元年充順天鄉試正考官二年充
會試正考官三年擢武英殿大學士四年加太
保十年加太傅十七年以疾卒

賜祭葬諡文端贈太師入祀賢良祠四十四年

御製懷舊詩稱爲龍翰福先生

大臣傳節鈔

文端夏日侍

皇子瀛臺讀書偶成長句用以示勸其詩云高柳修篁四面陰纖塵不到講筵深細旃廣廈無煩暑要道微言須會心物我相關方是學驕矜偶見便非欽子臣交責非容易莫爲嬉遊廢討尋誦此詩可想見師道尊嚴嘉言啟迪夫以天家貴胄猶戒嬉遊則凡公卿大夫士之子弟宜何如遜志時敏惜陰自勵耶誦此詩者當益知勸勉矣

聽松廬詩話

摘句 干羽七句聞帝典戎軒六月紀周詩

平定青海

國朝詩人徵略二編卷十三

番禺張維屏子樹輯

史貽直

字倣絃號鐵崖江蘇溧陽人康熙三十九年進士
官至大學士諡文靖

貽直由庶吉士散館授檢討康熙五十年充雲南
鄉試正考官五十一年提督廣東學政雍正元年
命在南書房行走擢吏部侍郎二年充會試副考官五年
充會試副考官七年署福建總督八年調兩江總
督貽直以本籍疏辭

詔弗允九年還京兼理吏部戶部事十年署陝西巡撫十
三年署湖廣總督乾隆三年授工部尚書調刑部
五年調兵部七年遷吏部尚書協辦大學士九年
授文淵閣大學士十年充會試正考官加太子
太保二十年因鄂昌案原品休致二十二年

上南巡貽直迎

駕于沂州

上諭史貽直着仍補授大學士入閣辦事二十五年八月
上以貽直爲康熙庚辰進士今周甲尙在朝洵昇平人瑞
賜詩曰庚辰先進杏花芳周甲重看藥榜黃早識家聲孝

山史羣稱風度曲江張本衙門有新佳話國史院無舊
等行寧獨搢紳慶人瑞贊予文治底平康二十六年貽

直生辰

賜詩十一月預香山九老會

御詩比之宋臣富弼文彥博有元豐二相今猶在履道諸
賢詎可方之句十二月

特命于紫禁城內乘轎二十八年貽直卒加贈太保

賜祭葬諡文靖入祀賢良祠

大臣傳
節鈔

公以本省人督本省

本朝一人而已

京江耆
舊集

相傳史文靖公相府有牌十對一曰一品當朝二
曰兩江總督三曰三朝元老四曰四代同堂五曰
五子登科六曰六部尙書七曰七省軍門八曰八
旗教習九曰九門提督十曰十度 欽差八旗

教習在他人無足奇在公却不可少有此而十數
乃完全無缺也其事不知確否姑錄存其說以助

美談

松軒
隨筆

摘句

聖朝會見麟遊園

泰運方看鳳

在林禮樂百年瞻至治薦賢爲 國有同

心

駕幸
貢院恭賦

段 斯

字浴川雲南安寧州人康熙三十九年進士官戶部湖廣司主事有皆山堂詩集

滇之段氏自晉天福中建國大理世有其地至元憲宗時始入朝其間若正淳遣使求經籍信苴福條奏地圖又著征行集今浴川所撰述殆遠過其

先世

皆山堂集序
王式丹撰

庚辰秋晤段玉川先生於青城之署因盡睹其由滇入燕之註先生以癯然之軀陟高臨深朝有吟

夕有紀古今勝蹟各有憑弔

皆山堂集序
魯亮齋撰

余喜遊覽性耽苦吟陡壁峙天蛇盤鳥道人所震
怖者余敲句未成已過之矣危灘怪石天塹奔流
人所惕懼者余扣舷而歌又過之矣

皆山堂集
序所自撰

雲南道里遼遠知交甚稀久欲輯滇人詩無從覓
購曩晤程月川中丞則又恩恩未遑及此前年陳
炯齋茂才

徽言

來粵見訪因詢及滇人詩炯齋既

出甯州者舊錄又以所撰華藏居詩話見示然皆
鈔本卷帙有限篇什無多惟段君浴川皆山堂集
既有刻本而詩又多其詩性情既真風格亦雋亟
取其愜心者錄之刻之

聽松廬
詩話

標題

油柑關 愍忠寺

唐太宗征遼時萬人塚也 以上五古

安慶謁余忠宣公祠 臥龍岡謁武侯祠

太學石鼓歌 燕趙悲歌行 以上七古

摘句

大觀天在水獨醒夜如年 湖心夜泊

地冷蚩尤霧城高督亢圖 涿鹿道中

歲華雙鬢覺鄉思一燈知 客中暮春

鳳儀樂奏開春仗象輦班齊肅靜鞭 傳臚

春殿彈冠三百輩橋門觀禮萬千人 釋褐

燈前絃管春三五夢裏關山路七千 都門上元

萬里塵埃莊子馬一街燈火葉公龍 偏橋月夜

魂夢早牽新草色江山應識舊詩人

北上別弟

凍雲過盡纔知路羸馬行遲好看山

清平道中

竹書萬卷襄王塚煙樹幾家君子村

衛輝道中

風利似刀愁不斷雪平於膝僕難前

新鄉大雪

三邊雨洗烽嵐氣萬里春蘇草木風

薊門曉望

豚拜風來潮有勢龍拖雨過水添腥

揚子江

欲尋黃鶴無尋處且作青蓮未作詩

黃鶴樓

山連楚蜀周遭碧水合沅湘日夜流

岳州

殘月光中遊子夢亂雲堆裏馬蹄聲

返滇

千古有誰消受得玉環顏色謫仙詩

牡丹

國朝詩人徵略二編卷十五

番禺張維屏子樹韜

方苞

字鳳九號靈皋一號望溪安徽桐城人康熙四十五年會試中式舉人官至內閣學士兼禮部侍郎後落職脩書

特賜侍講銜致仕有望溪文集

苞寄籍上元康熙四十五年由舉人會試中式以母病未預

殿試五十年苞爲載名世所著作序論斬五十二年

從寬免罪

上知苞文學

特命入直南書房雍正二年苞請假歸葬三年還京
召見有

先帝持法朕原情汝老學當知此義之

諭九年

特授左中允十一年擢內閣學士乾隆元年苞遵
旨選錄有明制義四百八十六

國朝制義二百九十七以清真雅正爲宗呈

欽定頒行天下尋充三禮義疏館副總裁

命再入南書房二年擢禮部右侍郎四年

命武英殿重刊十三經廿一史苞疏請

敕內府徧查舊本並

敕江南浙江江西湖廣福建五省督撫購送舊板經史彼

此互證從之苞年近八旬時患疾痛懇回籍調理

恩准回籍十六年卒

大臣傳
節鈔

周官集注方苞撰其注仿朱子之例采合衆說者

不復標目全引一家之說者乃著其名

提要
四庫

儀禮析疑方苞撰苞晚年自謂治儀禮十一次用

力良勤然亦頗勇於自信

提要
四庫

禮記析疑方苞撰融會舊說斷以己意

提要 四庫

春秋通論方苞撰掃公穀穿鑿之談滌孫胡鍤薄

之見息心靜氣以經求經

提要 四庫

周官辨方苞撰大旨以竄亂歸之劉歆凡十篇已

錄入所著望溪文集中

提要 四庫

桐城方氏

苞

主宋學儀徵阮氏

元

主漢學望溪侍

郎好詆康成雲臺宮保篤信鄭氏是以宮保刻

皇清經解凡方氏之書概不錄焉愚謂聖道如天經義若

海春秋冬夏天無不該河漢江淮海無不納與其

存町畦之見何如廓天海之觀乎

松心 日錄

王莽獨稱歆爲國師則凡莽之假經以文奸皆歆之主謀以助篡望溪之論是也劉歆阿莽揚雄諛莽皆名教之罪人歆之罪彰雄之罪隱韓昌黎乃謂雄爲聖人之徒以雄與孟子並稱曰軻雄嗚呼知人難知言亦不易

聽松廬
文鈔

方望溪論古文謂失其傳者七百年其意自以爲直接韓歐而意所專注尤在昌黎然望溪集余嘗反覆數次矣竊以爲方得韓之清未得韓之腴得韓之蒼未得韓之厚得韓之筋未得韓之骨得韓之健未得韓之雄

聽松廬
文鈔

公遭奇禍論死李安溪相國力救之幸荷

聖祖如天之仁宥死隸旗下以白衣直

禁廷

鮪埼亭集

孫嘉淦被劾下獄苞謂大學士鄂爾泰曰孫侍郎

以非罪死公復何顏坐中書於是嘉淦得免

江寧府志

全謝山撰公神道碑謂公惓惓於斯世斯民謝山

誠知公者然公嘗欲禁酒又欲禁淡巴菰若行此

二禁必大擾民所以知古又貴知今也

松軒隨筆

魏叔子方望溪惓子居皆於史記有心得者

松心日錄

摘句 陶潛經世人志不關沮溺東皋日荷鋤憂

勤同運 巒春風沂水情孔顏宜命席

國朝詩人徵略二編卷十七

番禺張維屏子樹輯

惠士奇

字仲弼號半農江蘇吳縣人康熙四十八年進士官至翰林院侍讀

易說惠士奇撰是書雜釋卦爻以象爲主有意矯王弼以來空言說經之弊故徵引極博而不免稍失之雜然士奇博極羣書學有根柢其精研之處實不可磨

四庫提要

宋儒說易以程傳爲詳且備然其中有未安者讀

惠半農易說贊獲我心因爲疏證其辭引申其義

偶列數條於左與治易者商兌焉

松心
目錄

卽鹿 古文麓作鹿應劭曰鹿者林之大者也

幾不如舍 書曰若虞機張此幾之證也詩曰舍

拔則獲此舍之證也言張機不如釋栝也

需于血出自穴 程傳謂穴爲物所安其義未明

地有穴所謂竅於山川是也人身有三百六十

穴以通氣血出自穴者出此穴而通彼穴也以地

言之則爲雲以人言之則爲血需卦坎在乾上坎

爲水故曰雲上于天坎爲血故曰血出自穴

包荒 程傳謂包含荒穢夫荒穢當清理之但包含之乎 荒古作兪說文云兪水廣也包荒言量如水之廣也河發源西北乾位故取象於馮河

地中有山謙 程傳謂外卑下而內蘊高大之象夫內蘊高大非謙象也且外卑內高似山藏於地下是地下有山非地中有山 地中有山言地之大而中有山亦甚小耳亦甚少耳凡人自大自多則不謙自覺其小自覺其少則謙以山言之則高大矣以地言之則山乃地中之一物何高大之足云泥於山高地卑未卽地之全體一思之耳

豮豕之牙 程傳謂豮去其勢則牙雖存而剛蹶
自止夫豕爲常畜未聞豕以牙齧人且去其勢亦
非爲防其牙也 爾雅豮豕幼豕也六
四童牛六五豮豕其義一也牙鄭康成讀爲互周
禮牛人共牛牲之互此一證也漢書劉向傳注互
字或作牙此又一證也陸甸謂牙者繫豕之棧幼
豕性奔突故繫於牙以禁止之與牝牛之義同
遇主于巷 程傳謂巷者委曲之途當委曲求於
相遇夫委曲求遇近於苟合易爲君子謀豈有爲
是言者九二剛中之德亦非委曲求合之象也

巷古作術廣雅云術道也爾雅云宮中巷謂之壺
詩曰室家之壺離騷曰家巷巷卽壺也賓主相會
于堂則禮必備相遇于巷則禮不必備禮不備而
道未失故曰遇主于巷未失道也當睽離之時君
臣之間宜從簡質不必講大禮大儀故卦辭曰睽
小事吉卽此義也春秋書會書遇與會禮異
已事遄往 程傳謂事旣已則速去之夫經言已
事不言事已乃倒經文以就已說可乎 已事者
已成之事也大戴禮曰不習爲吏而視已事此已
事之一證也漢書賈誼曰三代所以長久者其已

事可知也此已事之又一證也已事猶言成事戰國策曰觀成事已事猶言成憲書曰監于先王成憲其永無愆此又已事遄往无咎之一證也有成憲可遵則當速行不可怠廢故已事卽繼以遄往
莫陸 程傳謂莫爲馬齒莫夫馬齒莫於古無徵於夫無涉或謂陸爲商陸去商言陸草耶否耶

莫古莞字陸古睦字莫笑貌莫陸和悅之象也論

語莫爾而笑釋文云莫華版反是唐時論語猶有

作莫爾者以陸爲陸漢碑數見

唐扶頌嚴舉碑郭仲奇碑皆作和陸

此字義之可證者也夫上卦爲兌兌說也彖曰健

而說決而和莫卽悅也陸卽和也此卦義之可證者也且初爻言趾三言頰四言臀二與上言號皆就人身言之則莫爲笑見於面又何疑乎 同人

言號笑萃言號笑夬言號笑

莫者笑也

一握爲笑 程傳謂一握俗語一團也以俗語解

經無徵不信 握古文作盞一見說文一見淮南

子淮南高誘注盞持也盞古握字也

見文選任彥昇詩李善注

又考素問云變動爲握合素問之變與高注之持可得握字之義一握者一轉手也蓋言速也言能

誠切以求則萃必速矣故曰若號一握爲笑

奔其机 程傳以机爲俯就其義小矣 机卽刀

刀象机形說文云刀下基也當渙散之時必得基

而後安奔者不可緩也漢高祖保關中光武據河

內先主取益州唐太宗不與李密爭東都而引兵

還長安皆所謂奔其机也凡尻處皆從几

松心
日錄

惠半農云北極天之至高昆侖地之至高愚謂北

極之高不待言昆侖則有遠近大小不同禹貢之

昆侖近在酒泉史記之昆侖遠在西域高二千五

百里卽天山是也易說渾言昆侖故爲別之

松軒
隨筆

摘句 登棧人行紅樹杪隔溪猿嘯白雲中

國朝詩人徵略二編卷十八

番禺張維屏子樹輯

王世芳

字芝圃浙江臨海人貢生官翰林院侍講

先生生于順治己亥九月九日寅時康熙丙辰從
貝子征耿逆血戰斬寇數十人適貝子遽卒未及
奏功議敘年四十九始補博士弟子員繼而貢成
均官遂昌司訓乾隆辛巳蒙

恩授國子監司業庚寅加翰林院侍講時已百十二歲矣
當七旬時孫曾已盛逮百齡外曾孫復舉曾孫相

傅先生中年入天台有人授水二勺一熱一冷先生飲其熱者人或叩之笑不答但曰吾生平無他過人視聲色貨利淡而已由是人皆以王壽星呼

之

兩般秋雨
盦隨筆

趙振鯨浙江杭州人嘉慶甲戌一百歲蒙

恩賜六品頂帶梁山舟學士爲書聯云身歷四朝太平黎

庶壽登兩甲盛世耆英

全上

藍祥廣西慶源人年一百四十四歲

恩賜六品頂帶

全上

二人無詩附記於此

老漁
閑話

摘句 身歷四朝沾浩蕩眼看七代長兒孫

國朝詩人徵略二編卷十九

番禺張維屏子樹輯

儲大文

字六雅號畫溪江蘇宜興人康熙六十年進士官翰林院編修有存硯樓文集

大文全集十六卷而論形勢者居七卷

國朝百有餘年惟閻若璩明於沿革大文詳於險易顧祖禹方輿紀要考證史文雖極博洽往往以兩軍趨戰中途相遇之地卽指爲兵家所必爭不及

二人之精核也

提要 四庫

儲六雅論形勢於楚最詳次則秦蜀但原文太繁
今撮舉數條俾觀者略得其概云

荆襄 古稱用武之地曰荆襄襄固則荆固

襄樊 襄陽之有樊城猶齒之有唇

襄陽 李忠定公綱曰天下形勢關中爲上襄陽
次之建康又次之

襄鄧 鄧者古之南陽西鄰關陝可以召兵南通
巴蜀可致貨財東達江淮可運米穀有高
山可以控扼有廣土可以屯兵

淮南 淮南荆襄者東南之屏蔽也六朝所以能

保有江左者以強兵巨鎮在淮南荆襄也

西陵 荆楚形勢尤重西陵陸抗築城於赤溪

巴陵 巴陵天險吳魯肅晉陶侃皆築城於此

夷陵 夷陵要害國之關限

陸遜
秦疏

方城 楚國方城以爲城 方城山名在葉縣

秦有三關 大散關 仙人關 箭筈關

饒風關 在石泉縣西 宋吳玠拒金兵於此

麥子山 在夔州府東 東連湖廣北通陝西

山有四砦

紅線巖
栗子砦

篩羅垠
雙古墳

可容數萬

人止一綫路可通上有平田古井

褒斜 南口曰褒北口曰斜長四百七十里

七盤嶺盤迴七轉至巔尤險峻由此北入

連雲棧 張雷侯說高祖燒絕所過棧道

諸葛武侯由斜谷取郿皆此道也

箕谷 諸葛武侯命趙雲鄧芝據箕谷為疑軍

駱儻 南口曰儻北口曰駱中屈曲八十餘里

駱谷 在盩厔縣西南 姜維圍長城由此出

子午谷有二 一在洋縣東魏延請分兵由子午

谷而北即此 一騎紅塵妃子笑 唐貢荔支亦此路

一在西安府城南王莽通子午道即此

棧道有四出 從成和階文出者爲沓中陰平道

鄧艾伐蜀由之 從兩當出者爲故道漢

高帝攻陳倉由之

按道山有路通漢中

從褒鳳出

者爲今連雲棧道漢王往南鄭由之

唐元宗幸

蜀亦由此

從洋縣出者爲斜駱道諸葛武侯

屯渭上由之此秦蜀之險要也

松心目錄

儲六雅文集有取道一篇於西域道里甚詳歷二十餘年而稿乃定於地理之學可謂勤矣然詳於古而略於今其時準回之地未入版圖無怪六雅之不能詳也今據存研樓集新疆識略二書約舉

其要條列於左既便於觀覽且俾讀史者知今某地卽古某地亦易於考證焉

肅州 漢爲酒泉

甘州涼州肅州瓜州沙州 皆古月支地

嘉峪

東距肅州七十里

出嘉峪關至哈密約一千五百里

哈密 古爲伊吾 唐爲伊州

哈密爲新疆門戶 南北二路皆由此

吐魯番 古爲交河 漢爲車師前王地

晉爲高昌 唐貞觀十四年平高昌

西番諸地通貢市皆由吐魯番達中國

新疆 今之新疆 古之西域

新疆全境 周圍二萬餘里

東西七千餘里 南北三千餘里

新疆界址 東界甘肅安西州 西界布魯特

南界西藏 北界科布多

東北界蒙古 阿拉善 喀爾喀

東南界蒙古 青海

西北界哈薩克

西南界布魯特 圖伯特 克什米

爾 此種邊外夷人
習巫蠱念黑經

新疆北路

天山之北

天山一名祁連山

巴里坤 哈密至巴里坤三百三十里

天山之陽爲哈密 天山之陰爲巴里坤

有漢敦煌太守裴岑紀功碑

有唐姜行本紀功碑

碑在天山

烏魯木齊 哈密至烏魯木齊一千六百里

塔爾巴哈台 在伊犁東北一千九百里

伊犁 統轄新疆 有九城

哈密至伊犁約三千五百里

以上爲新疆北路

新疆南路

天山之南

喀喇沙爾

哈密至喀喇沙爾一千七百里

庫車

喀喇沙爾至庫車一千一百里

阿克蘇

庫車至阿克蘇八百里

烏什

阿克蘇至烏什二百四十里

葉爾羌

阿克蘇至葉爾羌一千四百里

和闐

葉爾羌至和闐八百里

英吉沙爾

葉爾羌至英吉沙爾三百六十里

喀什噶爾

葉爾羌至喀什噶爾五百七十里

以上爲新疆南路 是爲南八城

伊犁 古爲烏孫 唐爲西突厥 明爲瓦剌

烏魯木齊 古爲車師後部

巴里坤 古爲伊吾廬

塔爾巴哈台 古爲匈奴

以上爲北路古地名

喀喇沙爾 古爲焉耆國

庫車 古爲龜茲國 唐設安西都護府

阿克蘇 古爲溫宿國

烏什 古爲尉頭國

葉爾羌 古爲莎車國

和闐

古爲于闐國

英吉沙爾

古爲依耐國

喀什噶爾

古爲疏勒國

以上爲南路古地名

厄魯特

卽準噶爾 元爲阿魯台

哈薩克

漢爲康居國

布魯特

漢爲休循國 捐毒國

唐爲大勃律 小勃律

土爾扈特

準噶爾四部之一 昭爲瓦剌

以上爲新疆附近部落

喀喇沙爾 喀喇黑也沙爾城也年久城黑也

庫車 庫此地也車智井也此地有智井也

阿克蘇 阿克白也蘇水也昔水患茫茫白也

烏什 山石突出也

葉爾羌 葉爾地也羌廣也言地寬廣也

和闐 其義未詳

英吉沙爾 英吉新也沙爾城也言新建城也

喀什噶爾 喀什各色也噶爾磚房也言地富庶

多磚房也

以上爲八城名義

康熙三十五年

聖駕親征準噶爾大將軍費揚古追擊噶爾丹噶爾丹遁
康熙五十四年始駐兵巴里坤

康熙五十九年吐魯番回衆降

雍正十三年始設駐防於哈密及巴里坤

乾隆二十二年平定準噶爾 始議建伊犁城

乾隆二十四年平定回部 始議建八城

乾隆二十七年始設伊犁將軍 定官制兵制

乾隆三十六年土爾扈特全部投誠凡十六萬口

蓋至是蒙古之族無不來享來王遵道遵路焉

自古西域通道始於張騫而不能得月氏要領求
馬繼以廣利而不能下小國堅城蓋漢於西域勤
天下之力以務之卒有輪臺之悔洪惟我

聖朝上順天心下因人事先平準部繼平回部天山月窟
咸隸版圖茲謹撮其大略俾僻壤無書者得以稍
廓見聞有志於地理之學者欲考其詳自有

欽定皇輿西域圖志

欽定新疆識略二書在

松心
日錄

摘句 千杯傾綠酒一劍渡黃河

放眼江湖尋釣石側身天地把吟編

國朝詩人徵略二編卷二十

番禺張維屏子樹輯

楊廷璋

字奉峩號玉亭漢軍鑲黃旗人由筆帖式官至
體仁閣大學士諡勤愨有餘集

雍正七年由筆帖式授工部主事歷遷員外郎中
十一年授廣西桂林府知府乾隆二年遷左江道
十五年陞按察使二十年遷湖南布政使二十一年
擢浙江巡撫二十三年奏請仁和錢塘蕭山三
縣江塘照海塘例以二十丈爲准按段編號立石

以便稽查仁錢二縣江塘除民房堤岸外餘二十餘里照海塘例每二里設堡分防從之二十四年授兵部尙書總督閩浙奏言台州府屬黃巖場沿海未墾沙塗徹底清查於適中地立界迤南近場者歸甌迤北近縣者歸民責令築塘試種戶以百畝爲率分限起科沿海可得腴產十萬畝得

旨嘉獎又奏言臺灣產米穀賤妨農內地歉收米昂民人每偷渡就食查禁終難盡絕不若酌寬米禁內地米增價必平減應請往來臺廈之橫洋船每船準販米二百石穀倍之糖船照例准帶食米六十石

米船自臺灣鹿耳門出口收入泉州廈門編號給
照開報米數令商及船戶呈驗繳銷如所議行二
十八年加太子太保十二月授 體仁閣大學士
仍留總督任二十九年

諭來京候旨授散秩大臣十二月授工部尙書三十年六
月署兩廣總督三十一年十二月

命赴永昌幫辦軍務三十二年奏言緬匪狡詐乞降難信
總督楊應琚疾已愈臣遵

旨仍回粵東三月授刑部尙書三十三年

命紫禁城內騎馬八月授直隸總督三十六年十月授刑

部尙書十一月恭遇

孝聖憲皇后八旬萬壽延璋與九老會

賜遊香山十二月卒

賜祭葬如例諡勤愨

大臣傳
節鈔

府君自康熙辛卯以後屢入棘闈俱薦而不售己
亥年三十一考中筆帖式在任踰十載會

國家選擇清漢兼通之員遂擢工部主事

勤愨公
行述

府君撫浙時海鹽有縣役吳良陳貴等遇事生風
誣良嚇詐提訊得實立置之法由是各屬奸胥蠹
役聞風震懾民賴以安

行述

西湖周圍三十餘里受武林諸山之水匯聚成湖
由湧金水門入城出武林艮山等門會上塘河直
達海甯民田數千頃藉以灌溉瀕湖小民栽荷蓄
魚日漸侵佔始則圈湖成蕩繼復填築成田致失
故址四分之一府君特奏請清釐將有礙水源之
處所佔田蕩清出歸湖自此下塘田畝不虞旱燥
復築堤於湧金門外堤旁徧栽桃柳人稱楊公堤
遠與白蘇兩堤爭豔矣

述行

湖州居天目下游爲苕霅二水所聚藉太湖以資
疏洩而水出太湖必由澗港分洩年久淤墊雨稍

多田被淹府君周察形勢必須開濬漕港因請

旨借動款項將七十二漕港通行疏挑數年來不特水患

除而且屢豐誌慶

述行

府君總督兩廣瓊崖黎岐因客民販貨習熟娶黎婦爲妻見黎人貧愚放銀重利盤剝兼之作踐欺凌黎人挾仇糾衆焚殺府君聞信卽親率鎮道勦撫兼行拏獲首犯正法梟示又條陳善後事宜黎

岐俱各安生業焉

述行

府君八旬壽辰

欽差大臣頒

恩賜御書協中延慶匾額又

御書績宣中外久彌劭裘閱春秋老益強對聯并紅絨結
頂帽黃辮朝珠蟒袍補褂鞋帶荷包玉如意並

諭文武大臣慶賀演戲眞異數也

行述

己丑授直隸總督庚寅五月永定河堤以積雨坍
十八丈府君奔赴工所會同搶築而壩埽屢遭大
雨衝失設法作軟鑲草壩逼溜以歸引河乃得合

龍告竣

行述

府君生於康熙二十八年己巳卒於乾隆三十六
年辛卯享壽八十有三

行述

先大父勤慤公歷官事實載在

國史著作罕有傳者惟餘集一編板存家塾遠在京

邸先君子宦蜀時曾攜赴任所印行於西川道光

壬寅

濡

復由蜀之劍州牧擢守粵東重歷先公秉

節之地追思舊澤敢墜徽音因檢篋中印本再付

梓人以廣其傳亦藉以爲繼述之一端云爾時道

光二十五年歲次乙巳七月朔有二日

賜進士出身知肇慶府事第八孫

濡

謹誌

重刻餘集跋

公詩集自序云冬者歲之餘夜者日之餘兩者時

之餘辦事稍暇爲公餘因名其集曰餘集

聽松廬詩話

楊勤愨公童時隨任榆林讀書之暇初學平仄師
謂新秋氣爽正好吟詩公卽援筆成一律云暑退
居諸變新秋爽氣微千山雲外瘦一葉樹間飛玉
露催花老金風送雁歸勝州邊塞地早授禦寒衣
初出筆爲詩卽辭意溫厚局度安詳識者已知爲

不凡之器

聽松廬
詩話

標題 十芝行 有序

說苑神草曰芝不生凡圃予秉臬西粵時偶於樹
根花間得芝三本攜赴長沙藩署十閱月而有撫
浙之役瀕行忽於樹本中得紫芝一大顆自是由

浙總制閩疆先後兩署中俱產芝或於賓館或於書齋或於廳事積而成九所謂產靈芝而九莖者歟最後於福建督署得一本青蓋紫莖較前尤異乃奉

命掌綸扉之嘉兆也予樂其得數十全取以名堂曰十芝頌

天錫志

君恩示子孫焉

楊勤愨
公餘集

摘句 粵嶺南關外燕雲北斗邊

水從山峒出雲繞竹輿行

一與叢萬綠匹馬踏千紅

灘瀑非關雨風林却滿秋

勢接三韓朝五岳城連萬里鎖千山

居庸關

是樹不爭凡樹綠非花更比好花紅

紅葉

飲酒大都綠禦瘴裁詩多半爲思家

高坡

芝蘭氣味聯三友清白家風凜四知

和友人

蠻嶺瘴來雲似漆灘江槎上水如天

誌別

千古風濤鳴蕙苒漫天雪浪壯山河

伏波灘

洞庭波浪連雲白湘浦楓林映日紅

秋興

萬里投荒仍故我十年作吏半新絲

感懷

樓高百尺仙長集

觀音山上
有五層樓

水納三江浪

自洪

廣州

雲擁山花新著雨月移牕竹晚篩風

寫懷

九日風光多盛事十年登眺幾重陽

九日

纔從馬峽穿藤峽便下神灘向弩灘

赴海

眠石初醒莊叟夢披雲已化葛仙衣

羅浮
蝶

蠻煙瘴雨寒風夜幾轉憂思到白頭

雨夜

日暮孤舟泊不穩夢魂那得到鄉關

舟中
夜詠

息機只合讀書好不問年華炎與涼

秋興

三五摸魚歌不歇一燈漁火小橋西

國朝詩人徵略二編卷二十一

番禺張維屏子樹輯

范 咸

字貞吉號九池浙江錢唐人雍正元年進士官御史有浣浦詩鈔

雍正元年四月舉鄉試九月舉會試十一月行

殿試以天時沍寒命殿上設金鑪十二并撤

御膳以賜浣浦一歲之中以諸生遂躋侍從散館

召對誤稱門生而

天顏甚霽既退猶笑語諸大臣曰范咸欲爲天子門生也

所著有周易原始讀經小識碧山樓古今文稿玉

堂蠹餘柱下奏議海外奏議臺灣府志

杭州詩輯

浣浦由春坊庶子督學山西以事罷職在

咸安宮行走授編修擢御史巡視臺灣又以事罷職

主鼇峯粵秀兩書院乾隆辛未

聖駕南巡復御史原官卒年七十

同上

摘句

天與水爲一遠颿同秋毫

渡海

遠望峻嶺矗水沸山嶽搖舵師噤不語謂

是鯢魚尻

渡海

橋成數百丈斯世無與匹

洛陽橋

張坊

字和五號湘帆湖南湘潭人拔貢生官陽朔陽城陽曲曲沃縣知縣遷保德直隸州知州有敦好堂集

坊由拔貢生知陽朔縣省刑息訟所至有慈惠聲再任山西陽城士民愛慕者稱爲王屋仙吏知陽曲請以明總兵官周遇吉列入祀典天鎮關外早霜殺稼立青女祠祀之霜遂晚降慶有年調曲沃沃邑市居多水患令掘地得古石街脩治之水如赴壑今名張公街改驛遞均徭役豁免窮丁一千

七百餘人沃人爲建三不朽坊復祠祀馬遷保德直牧未幾告歸所至邑乘皆經修輯而曲沃一志考据尤爲精核著有古文尙書辯證東周紀年綱鑑萬言總論曲沃縣志湘帆詩話二冊

湖南通志

天鎮舊天城衛也雍正三年新設縣地荒寒早霜殺稼天陰時聞鬼哭君益任詢知疾苦出淮南子曉之曰青女乃出降以霜雪高誘注青女司霜雪者宜專祀衆曰然祠成率衆齋禱是歲霜不爲災穀稼豐衍不復聞鬼哭聲人謂霜神祀典創古所未備於是三年不早霜爲至誠所感云

張氏家譜

在曲沃任建議以計途遠近史村適均請以蒙城驛夫馬歸併太平縣史村中丞入奏

詔如議邑三十六里民皆歡呼稱便曲沃書院廢弛君援韓獻子之言顏曰從教增學費延耆儒主講設六學於城別設十八學於鄉由是士感勵科第顯者數十人劉文正公統勲見君所修曲沃新志歎曰背汾面澮誠確證也昔應劭失之今張君得之矣沃邑屢苦潦君言下當有石道掘至三尺果甃石君又開通拔劍泉溫泉七星海起水門以廣灌溉民至今受其賜後三十載孫世浣復攝是邑劉文

恪公權之曰異哉君宰桂平子九錡亦宰桂平君
官曲沃孫世浣亦官曲沃一時傳爲美談云

同上

湘帆先生歷宰數縣皆有循聲又復風雅宜人傳
爲佳話曲沃有岵岵先生大書兩詩立碑其上其
一詩云母曰嗟予子雲山何處是膝前貧亦歡身
後徒爲爾過者見之多感動不欲遠遊

聽松廬詩話

曲沃有太子廟後人并祀奚齊卓子前令改祀申
生邑人以爲不然辨訟不休湘帆先生定爲五公
子廟奉申生文公惠公奚齊卓子合祀焉當堂判
以詩詩曰太子沉舟往跡湮奚齊立廟究何因公

侯冢嗣人誰據今古滄桑事孰詢直享申生猶近
禮若偕卓子更無倫幾朝斷案如山積增祀向堂
始有神自先生判令合祀五公子而廟訟始息
陽曲村民王姓掘得祖遺窖穀千石族人爭之王
呈控呈詞有明隆慶崇禎窖簿眾以時逾百載地
中安得有完穀湘帆先生據禮記仲秋穿竇窖又
據史記任氏窖穀粟窖穀本有明徵取穀碾試炊
食猶馨乃斷以七百石與王姓子孫以三百石與
王姓族人眾皆悅服先生當堂判以詩詩曰高曾
五服自相親掘得黃糧出窖新異代兵荒難定案

千年文字好安民平情七百貽孫子推愛三分界
族人穀窖南方全不信太倉高爽尙成塵於此見
西北風土乾燥窖穀百餘年不壞又可見彼土之
民遇兵燹每取所寶之物藏諸土中如古銅器之
類徃徃有經千百年而後出土者此百餘歲之窖
穀猶未爲久遠也

同上

公事蹟甚多公會孫

家拭

刻之因錄數條於此

同上

摘句

明妃一去三千里

自注用常建句

蘇武曾經十九

年

自注用杜牧句

公出鴈門關之任天鎮繪圖作歌有此二句

總由沃國譌新晉致使鄉人失絳臺

晉北都考

國朝詩人徵略二編卷二十三

番禺張維屏子樹輯

李紘

字巨州號南園江西臨川人雍正二年進士官應城縣知縣有南園詩文集

巨州有南園答問一篇與柳州晉問深甯七觀顏頤西江掌錄此焉爲最詞科掌錄

由大學士朱軾薦舉博學宏詞與試未用鶴徵後錄

春秋春王正月或曰建寅或曰建子李巨州謂聖人斷無改時王正朔之理且爾雅春爲陽子爲一

陽子亦可爲春以子月爲明年以子半爲明日此

天數之本然古帝王迭用三正春秋正月斷爲建

子無疑

詳見南園文集
春王正月辨

其論正而確

橋心
目錄

摘句 吁嗟天壤間嘗有難能事當其未爲時皆

爲衆所避誠至數則回道伸權亦廢

離騷賦是愁人種貨殖書爲救世圖

感懷

一字千金真動魄萬言倚馬更通神

呈二兄

天上騎箕看出沒人間化鶴望來歸

哭二兄

雙手握時惟恐緩大聲呼處不容吞

夢二兄

自註夢中大呼二哥二兄者穆堂侍郎
紋也讀詩想見友于之篤聽松廬詩話